



EXAMINATIONS COUNCIL OF ESWATINI
Eswatini General Certificate of Secondary Education

SISWATI AS A SECOND LANGUAGE

6871/02

Paper 2 Listening Comprehension

Specimen-October /November 2021-2023

TAPESCRIPT

TAPESCRIPT

Track 1

R1 Examinations Council of Eswatini

**Eswatini General Certificate of Secondary Education
Examination Session 2021**

SISWATI AS A SECOND LANGUAGE - Listening Comprehension

Welcome to the Exam.

**Remember to fill in your name, Centre number and candidate number on the front page.
Do not talk to anyone during the exam.**

If you would like the recording to be louder or quieter, tell your invigilator NOW. The recording will not be stopped while you are doing the exam.

Invigilator: Please allow the candidates to fill in their details on the cover page, and when all candidates are ready to start the exam, please turn the recording back on.

Please press the pause button NOW.

Umsebenti 1**Track 2**

R1 Njengobe nonkhe senilungele luhlolo seluyacala – ke manje.

Fundza imibuto (a) – (e). Kulowo nalowo mbuto utawukuva lokukhulunywa ngako kuchazwe njengoba kunjalo ephepheni lakho. Utakuva lokukhulunywa ngako kabili.

Pause 00'05

R1 Umsebenti wekucala, imibuto (a) - (e)

Kute ukhone kuphendvula lemibuto (a) - (e) utawulalela tinhlobo letehlukene temisho. Bhala timphendvulo takho kuletikahala lowentelwe tona kuleliphepha. Phendvula ngalokufisha.

Utawukuva loku lokukhulunywa ngako kabili.

R1 Umbuto (a) Afanele kufika ngasikhatsini emalunga elikomidi?

*Nasi sekugcina simemetelo nine bekunene: Lonkhe lusha lwelibandla laseKhatholika eKhathedrali kaManzini luyakhunjutwa kutsi umhlanganosikolowa lotawuba khona ngeMgcibelo lesiya kuyo mhlatilishumi (10) kuyo Imphala, uyawucala ngensimbi yesiphohlongo ekuseni endlini yetincwadzi eKhathedrali. Emalunga elikomidi wona kucelwa afike kusele imizuzu lengemashumi lamatsatfu ungakacali umhlangano. **

Pause 00'10"

*Repeat from *to***

Pause 00'05"

R1 Umbuto (b) Labadvuna tibasita njani tindvumbu teliphopho?

*Tindvumbu tetitselo letidliwako tiyasita ekuvikeleni tifo kubantfu. Temaphopho nje tisita ekugayeni kahle kudla esiswini, tisite nekuvikela umdlavuzza kubobabe. Kani netemakopeni nato titsi takha likhofi lelimnandzi tiphindze tisite kucinisa ematsambo kumuntfu. **

Pause 00' 10"

*Repeat from *to***

Pause 00' 05"

R1 Umbuto (c) Yini ledzingekile uma ufuna kufundzela kushayela indiza?

*Mandla uyakutsandza kushayela tindiza. Thishela wakhe umeluleke kutsi umuntfu lofuna kufundzela kushayela tindiza kufanele abengumuntfu lonesibindzi, imfundvo nekutimisela. Tifundvo letingutona timcoka kakhulu nguleti tebuchwephesha, tesayensi, nesingisi **

Pause 00'10"

*Repeat from *to***

Pause 00'05"

R1 Umbuto (d) LaMotsa umvuselani Gatjeni?

*V1: Vuka babe! Yebabe vuka! Sheshisa babe vuka! Kuyonakala babe musa kulala.

V2: Kwente njani LaMotsa? Walwa nami ekuseni kangaka yini?

V1: Ngentiwa ngunaku lengikubona lapha ngephandle Gatjeni.

V2: Ngiphutfume LaMotsa kwentenjani?

V1: Kuneliphoyisa lelitako babe. Ngiyasola sebasimpimbile bantfu balapha, babe sentanjani?

V2: Hawu LaMotsa lita kuphi leliphoyisa?

V1: Licondze lapha ekhaya.

V2: Sesityawuwa ngalo kutsi litawufike litsini. Mhlawumbe setfuswa lite. **

Pause 00' 10"

*Repeat from *to***

Pause 00' 05 "

R1 Umbuto (e) Yini lebekwenta bantfu bakadzeni bahlale baphilile?

*Bantfu bakadzeni bebahamba ngetinyawo emabanga lamadze. Bebenta umphako ngekudla lokungakoniwa tipayisi. Bebahamba emahlatsini bagibele etihlahleni bentela kuphepha etilwaneni letiyingoti. Ngikobe bahlala baphilile. **

Pause 00'10"

*Repeat from *to***

Pause 00'05"

R1 Uyaphela la umsebenti wekucala. Sewutawuwa umsebenti wesibili. Nyalo - ke fundza lemibuto lelandzelako.

Pause 00'35

Track 3**Umsebenti 2**

Kute ukhona kuphendvula, utawulalela inkhulumo ngemphilo yesihlahla. Bhala timphendvulo takho ngemagama lengengci kulamabili kuletikakhala lowentelwe tona kuleliphepha.

Utayiva kabili lenkhulumo.

*Siyanemukela bafundzi base Velamuva. Lapha ke kuse Malolotja, sigcina tilwane kanye netihlahla temvelo. Mine ngingu babe Dladla, ngisebenta lapha eMalolotja. Namhla ke, ngitawukhuluma ngebumcoka bemphilo yesihlahla.

Sihlahla naso sinemphilo yaso fana nemuntfu. Sihlahla naso phela siyadla, sinatse ngendlela yaso, kantsi siphindze siphefumule. "Hawu! Njani?" Musani kubanga umsindvo phela bangani bami ngitonichazela kahle. Emacembe esihlahla entiwa aba netimbobo letincane lesidvonsa ngato umoya nasiphefumula. Bantfu bona badvonsa lomoya lokhishwa sihlahla. Kute umuntfu aphile, udzinga sihlahla, nesihlahla sidzinga umuntfu. "Kanjani?" Cha! Phela bantfwabami, lofuna kukhuluma akaphakamise sandla! Yebo, sike satsi sihlahla siyanatsa. Emanti lanatfwa sihlahla siwadvonsa emhlabatsini lapho simbele khona timphandze taso. Lamanti akhuphuka ngemitsambo yetimphandze taso ahambe ngemitsambo yesicu ate ayofika emitsanjeni yemacembe aso. Emandla ekupheka kudla kwaso sihlahla siwatfola emsebeni yelilanga. Ingati yesihlahla nguloluhlata lolwenta emacembe aso abenembala waso. Kukhona yini lonembuto? Ngiyabonga ke bantfwabami kungilalela, nyalo ke sengitanibuta imibuto. **

Pause 00'10"

Utawuyiva kwesibili lenkhulumo.

*Repeat from *to***

Pause 00'05"

R1 Uyaphela la umsebenti wesibili. Sewutawuva umsebenti wesitsatfu. Nyalo - ke fundza lemibuto lelandzelako

Pause 00'35

Track 4**R1 Umsebenzi 3**

Kute ukhona kuphendvula lemibuto lalela inkhulumo yebantfu labasikhombisa ngekonga imali. Kuleso naleso sikhulumi 1 – 7, khetsa kuloluhla A – H, kutsi ngumuphi umcondvo lovetwa sikhulumi. Bhala luhlavu ebhokisini. Sebentisa luhlavu kanye. Kunalunye luhlavu lolungakafaneli lusebente.

Utawuyiva kabili lenkhulumo.

Libandla lelifundzisa ngekongiwa kwetimali livakashela sikolwa sakho kutowetfula tifundvo ngebumcoka bekonga. Tikhulumi letehlukene tente tetfulo ngalesihloko sekongiwa kwemali.

Sikhulumi A

Asengitsatse lelitfuba kuvusela thishelanhloko, lisekela lakhe, bothishela kanye nani bafundzi. Libito lami nginguZamcolo Ndzimandze. Angitsatse lelitfuba kubonga sikolwa kutsi sisimeme sitokwetfula sifundvo ngebumcoka bekonga imali. Ngihamba nelibandla nalo lelitawukwetfula imivo yalo ngalesihloko. Sikukhandza kumcoka kakhulu kutsi tikolwa tinike litfuba kutsi bafundzi babe nelwati ngemali kanye nekongiwa kwayo. Imihlangano lenjengalena ke isiniketa litfuba lekutsi sifundzise sive ngayo imali nebumcoka bekuyonga. Umbuto lomkhulu ke kutsi yini imali? Imali singayichaza njengentfo leshicilelwe kutsi siyayisebentisa kutsi sitsenge ngayo. Imali iyehlukana, kukhona yemaphepha, kukhona futsi yensimbi. Libhange lelikhulu eveni ngilo lelibuketa kukhicitwa kwemali ngekubuka imigomo lebekiwe yelive kanye netinhlango letibuke kusetjentiswa kwetimali emaveni. Ngako ke, imali ngeke umane utikhicitele wena ungumuntfu. Ngingakanzi kakhulu, ngitawunika labanye balingani bami bachubeke kunichazela ngayo imali.

Sikhulumi B

Asibonge kubabe Ndzimandze kusicacisela kabanti ngayo imali. Imali siyisebentisa sonkhe sikhatsi kutsenga loko lesikufunako. Kodvwa kadzeni imali yayingekho. Bokhokho betfu bebaphila noko noma imali yayingekho. Bebasebentisa loko labanako bashintjiselane kute batfole labangenako. Ngibekise nje, ukhandze kutsi ekhaya ninetinkhomo, uma nifuna ummbila benihamba tiyocela emasaka kuloyo loshaye inala. Nimunike inkhomo, naye aninike emasaka embila. Bebakhona-ke kulondvolota loko labakutfole emasimini kute batawukusebentisa ngalokutako. Loku nguyona ngcikitsi yalomhlango wetfu lesingawo lana, konga. Sibantfwana kufanele sikhutsatwe ngekonga imali. Uma bengingabuta nje, ingabe bangakhi lakitsi labanemabhuku ekonga imali? Abasibo labanyenti njengoba nibona. Kungako ke sikukhandze kumcoka kutsi sinivakashela kulelilanga lanamuhla. Siyetsemba sitawutsi siphuma lana sitawube sesicaciselekile ngebumcoka bekonga imali. Sitawube sikhutsatelekile futsi kucala konga imali. Ngiyabonga kunginika indlebe. Dzadzawetfu Sindisiwe utawunichazele ngekulungiselela likusasa.

Sikhulumi C

Njengoba besengetfuliwe kutsi nginguSindisiwe, sibongo sami ke ngiwakaZungu. Sikhatsi lesinengi sibantfu senta liphutsa. Liphutsa lelikhulu kutsi senta tintfo nyalo, singacabangi ngelikusasa letfu. SiSwati sitsi sisu sibekelwa ngaphandle. Ngako ke kumcoka kwekutsi sibantfu silungiselele likusasa. Kulula ke kitsi sibantfwana kutsi singacabangi ngelikusasa ngoba sisanakekelwa batali. Konkhe lesikufunako sikutfola kubatali betfu. Kodvwa ke kufanele sati kutsi nguloyo naloyo wetfu unalo likusasa. Namuhla ungavuka unako konkhe, kodvwa kusasa uvuke ungenalutfo. Ngako ke, asicabange ngelikusasa letfu, sitilungiselele. Indlela lenhle yekutilungiselela kutsi songe imali. Leyo mali lebewuyonga iminyaka ungabese uyisebentisa etidzingweni takho ngalokutako. Loku kungaba kubhadala tindleko takho tekufundza enyuvesi, kucala ibhizisi nasewumdzala nalokunye nje lokunyenti. Ngiyabonga tihlobo tami kunginiketa lelitfuba.

Sikhulumi D

Sanibonani bafundzi nabothishela. Libito lami nginguGegatilomo Silindza. Sebakhulumile balingani bami ngebumcoka bekonga imali. Mhlawumbe niyatibuta nje nibafundzi kutsi nitayitsatsaphi imali lenitayonga ngoba anisebenti. Imphendvulo yaloko kutsi akusibo bantfu labasebentako kuphela labangakhona konga. Imali yenu leniphiwa yona batali nati kutsi kufanele nitetsengele noma ngabe yini leniyifunako nalenichazako. Linengi lenu nitsandza kutichaza nitsenge tintfo letidulile ngoba nicabanga kutsi injabulo yenu isekutseni nibonakale ngatsi ningulabanjingile. Kantsi-ke akusinjalo. Injabulo yemuntfu isekukhoni kutentela tintfo latifunako. Konga imali ngiko lokungasisita ekutseni sikhone kutentela lesikufunako ngalokutako. Ngako ke, imali lesiphiwa yona batali ningete nayisebentisa yonkhe. Ngibekise nje, uma batali bakho bakupha likhulu lemalangeni kutsi utawulidla ngeliviki, ungacala kancane ubeke E30 eceleni. Ngenyanga ungabe wonge E120 bese emnyakeni ungabe wonge E1440. Emnyakeni lelishumi ungabe wonge E14, 400. Cabanga ke kutsi ungatsi sewumdzala ube namalini. Asicaleni konga ematfuba asekhona.

Sikhulumi E

Nine bekunene, asibonge kubabe Silindza kusiniketa sitfombemcondvo ngemali lesingatakhela yona uma sicala kuyonga. Mine nginguSonakele. Labanye betfu lendzaba yekonga bayayinyantela nje kantsi imcoka kakhulu. Batitjela kutsi batawufundza, bayofundzela bese batfola umsebenti. Ngaleyondlela batawukhona kutiphilisa. Liciniso litsi asilati likusasa letfu kutsi lisiphatseleni njengoba lesinye sikhulumi besike sabeka lana. Lokunye futsi kutsi uma sesibadzala siba netintfo lesibheke kutsi sitente lokufana nekunakekela umndeni. Imali lesiyiholako ke ete yaba nguleyanele kutsi sifeze tonkhe tidzingeko telikhaya. Lowo mholo ungaphelela etandleni. Loku kungasibangela kutsi sikhatsateke emphefumleni lokugcina kukhinyabete inhlalakahle ekhaya. Uma babe noma make asahlala angakajabuli, bantfwana babese bayakhatsateka nabo. Konga ke ngusona sisombululo kuletinkinga leti. Uma wonge imali leyanele, sewungasebentisa leyo mali kubhadala tindleko tesikolwa tebantfwana, ungasabuki umholo wakho kuphela.

Sikhulumi F

Sesiya ngasemaphetselweni ke bangani bami, nginguZZ, lokungu Zuka Zulu, mine ngitawuchaza kafisha ngemiphumela lemihle yekonga. Uma ufuna kuphila imphilo lesezingeni lelisetulu uma sewumdzala kufanele ucale wonge. Dzadzewetfu Sonakele uvetile kafisha lokunye longakwenta ngaleyo mali. Kodvwa lokukhulu kakhulu kutsi konga kususa yonkhe inhlupheko, ungatsi sewumdzala utikhandze ushobela etikweletini. Labanye betfu sesigugile nje, letinwele ticedvwa kuhlala sicabanga kutsi sitawuyitsatsaphi imali yekwenta loko lesikudzingako. Kantsi uma ucala konga kusenyalo, utawutsi sewumdzala ukhombe ngalolusekhatsi. Kutawutsi nakuvela inhlupheko uvele ucondze ungunzwini yakho ngaphandle kwenkinga. Ungaze utikhandze ushobela etikweletini. Imali yakho loyongako nyalo itawukwenta imphilo ibe malula.

Sikhulumi G

Asinivusele bafundzi. Sesiphetsa lendzaba yetfu yalamuhla. Mhlawumbe niyatibuta nje kutsi yini leningayenta uma nifuna konga. Njengoba nine nisebancane, nisengakafiki eminyakeni yelishumi nesiphohlango, nitawudzinga lusito lwebatali benu kute nitovula libhuku lasebhanga. Uma senilivulile lelo bhuku, sewungacala ubeke imali yakho kancane kancane. Loku ke kutawudzinga umuntfu ashintje indlela lebekenta ngayo tintfo. Uma bewuyidla yonkhe imali yakho, nyalo sekutawufuneka ushintje indlela lobewenta ngayo tintfo. Sekutawufanele utekhute kuletinye tintfo kute utewukhona kusebentisa kahle imali yakho, wonge. Emaswidi nabonamnede kutawufuneka beme noma banciphe kakhulu. Kutsenga tintfo longatidzingi nalongaphila ngaphandle kwato nako kufuneka sekume. Kutekhuta kwakho ekusebentiseni imali ngendlela lengasiyo, kutawusita ekutseni ukhone konga kancono. Lonendlebe ke uvile, ngiyatsemba sitawucala konga kute sibe nelikusasa lelichakazile.

Pause 00'30"

Utawuyiva kwesibili lenkhulumo.

*Repeat from *to***

Pause 00'30"

R1 Uyaphela la umsebeni wesitsatfu. Sewutawuva umsebeni wesine. Nyalo - ke fundza lemibuto lelandzelako.

Pause 00'30

Track 5**Umsebenti 4**

Lalela inkhulumiswano emkhatsini waMkhulu Motsa nemfundzi lowenta luphenyo ngekukhonta bese uphendvula imibuto lelandzelako kuletikhala lowentelwe tona kuleliphepha.

Timphendvulo takho atibe timfisha noma tibe ngumusho munye.

Utawuyiva kabili lenkhulumiswano.

Kukhonta

*Mandla : Sawubona mkhulu Motsa

Mkhulu Motsa: Yebo mtukulu, kepha wena ungubani?

Mandla : Mine ngingu Mandla walapha ngesheya ka babe Mvila.

Mkhulu Motsa: Ngiyabonga mfana wami. Kepha ungihlasele ngani ekuseni kangaka?

Mandla : Wo mkhulu! Esikolweni basinikete umsebenti kutsi asihambe sente luphenyo ngekukhonta ngendlela lengiyo.

Mkhulu Motsa: Ngiyeva mfana wami. Tinyentana tintfo letenta umuntfu ahambe ayekukhonta kulenye indzawo ashiye yakubo, yemvelo. Nati – ke letintfo: uma acoshiwe, abone indzawo layitsandzako noma-ke mhlawumbe abalekele sifo, sewufuna kuyoshaywa ngumoya embili. Noma – ke angahanjiswa yini kepha kufanele afike akhonte lapho ayakhona. Akamane nje bese uyakha nje angatiwa.

Mandla : Ngiyeva mkhulu, bese kuhamba njani emva kwaloko?

Mkhulu Motsa: Kuhamba kanjena-ke kukhonta ngesiSwati. Lesikhonti kufanele sitfole lotakuba lincusa laso uma sihamba lendlela ye kukhonta. Lomuntfu uhamba naye baye kumgijimi waleyo ndzawo lakhonta kuyo. Lelincusa ngilo lelifike lichaze yonkhe indzaba labahamba ngayo. Naye-ke utawubutabuta nje imibutwana lemincane entele phela kutsi naye lendzaba ate ayitayeke angakafiki esikhulwini nasebandleni.

Mandla : Manje umgijimi bese wentani?

Mkhulu Motsa: Umgijimi utawubese uya nabo endvuneni. Indvuna itawukhuluma isekele umgijimi. Nelincusa uma ke lona litawukhuluma, lichaze ngebuhlobo balomuntfu lelimletsile.

Mandla : Ingani sikhulu lefanele sinike bantfu indzawo, ungenaphi umgijimi?

Mkhulu Motsa: Sikhulu site emandla ekutsatsa umuntfu ngaphandle kwelibandla. Sona sitawubese sibita libandla kutsi liphelele emphakatsini ngelilanga lelibekiwe ngekubona kwaso nendvuna yaso. Uma-ke selibekiwe lilanga, indvuna ikhipha emajaha kutsi amemete bantfu baphelele emphakatsi.

Mandla : Seyingena kanjani indvuna Ngobe solo ngihamba nemgijimi?

Mkhulu Motsa: Fana! Phela indvuna ngiyo lesondzele kakhulu esikhulwini, naleyati tonkhe tindzaba tendzawo.

Mandla : Wo! Ngiyeva mkhulu. Bese kwenteka njani emvakwaloko?

Mkhulu Motsa : Lingaphelela libandla emphakatsi noma sikhona noma singekho sikhulu, indvuna ngiyo levula umhlangano bese ibeka ludzaba lokuhlangenwe ngalo. Indvuna ikhuluma nje iyasho kutsi ikhulumela sikhulu.

Mandla : Libandla lisuke lifunani kulesikhonti?

Mkhulu Motsa : Uma indvuna seyimbikile lomuntfu wenkhosi, sikhulu sitamcela kutsi asukume limbone libandla. Angahlala phansi libandla libese likhuluma ngaye, lingambuta futsi kutsi uphumaphi, kodvwa imibuto leminyenti ibutwa lelincusa. Lincusa – ke lona likhokhelwa inkhomo yebuncusa balo. Ikhokhwa ngiso sikhonti.

Mandla : Emva kwaloko ubese unikwa indzawo yini?

Mkhulu Motsa : Lingahamba libandla kukhetfwa emadvodza noma mabili aye lapho kusuka khona sikhonti ayekuva kutsi ususwe yini. Lamadvodza avele aye esikhulwini sakhe. Kumele abuye abikele sikhulu ngemlandvo walomuntfu. Libandla lingenetiseka ubese ukhonjwa indzawo yekwakha kanye nekulima. Lona ngumsebeni wemisumpe yenzawo. Bangamnika indzawo bese ukhipha inkhomo yesikhulu, aphise tjwala bekumcabela. Sikhulu simemeta bantfu bete kutawusita sikhonti kucaba. Emajaha agawula tintfungo nemahlaha, bafati netintfombi basike tjani beluke emakhenya ekufulela babuye bagige bayifake nengcongwane. Naphansi bayayila bentele kutsi kulaleke kahle.

Mandla : Nase akwentile konkhe loko, usuke asawalapho ngalokuphelele yini?

Mkhulu Motsa : Umgijimi ubese uyamchuba umyisa enkantolo kute ashintjintje emapasi akhe, asale abita lesikhulu lasangene kuso. Kukhonta lokuphelele kukhonta ngetincwadzi. Kukhontela emgwacweni, noma-ke kukhuluma nesikhulu sisodvwa, akusiko kukhonta ngendlela.

Mandla : Ngiyabonga mkhulu, ungisitile kakhulu. Esikolweni ngitawuba lucucudvu kutawubukwa mine.

Mkhulu Motsa : kulungile fana lakhe, uhambe kahle mkhulu. Ubobuya phela nawufuna lolunye lwati, ungesabi.

Mandla : Kulungile mkhulu. **

Pause 00'10"

Utawuyiva kwesibili lenkhulumo.

*Repeat from *to**
Pause 00'3"*

R1 Uyaphela la umsebeni wesine.

Pause 00'10"

Sewutawuva umsebeni wesihlanu. Nyalo - ke fundza lemibuto lelandzelako.

Umsebenti 5

Kute ukhone kuphendvula, lalela lenkhulumo bese ugcwalisa tikhala lowentelwe tona kuleliphepha ngemagama langengci kulamane.

Utawuyiva kabili lenkhulumo.

Letinkhomo ngemabheka

*Letinkhomo leti njengoba utibona nje tabuya kaGule. Gule loyo lowafa engotini yemoto abuya emgodzini kuyosebenta. Phela lawa ngemabheka adzadzewetfu lowendza kumsa wakhe loGule.

Lela tfole lelimunyako-ke lona litalelwe lapha ekhaya. Lenkunzi le yona yefika yangetfusa ngoba yayingafuni kulala esibayeni. Noko-ke nyalo ngifuna kuntjintjisa le ngaletawuba yinkhabi yekulima.

Nawungabuka nje wena mntfwana anti, letinkhomo leti, tilicala lihamba ngemasondvo. Uyati nawe kutsi labadzala batsi nibotidla nitibeke ematsambo. Phela, emantfombatana lawa alamuhla, ayehluleka kubeketela emendvweni. Lona-ke wababe lesebamtsatsa bakaGule, ngimati kahle. Luhlobo lwakitsi lolu lweMatfombeni, luyatiwa ngekukhatsata.

Umthandazo wami munye vo, kutsi lamahlazo lawa lavamile ebafati bekubuya emendvweni, angenteki kulomuti lo weMatfombeni. Lobubi lobu lengike ngabubona, ngingeke sengibusho nekubusho ngoba abukhulumeki nekukhulumeka. Wena-ke mntfwana-anti, usemncane. Nangingakutjela ngalobubi kungenteka kukulinge kutsi ukwente nasewuve ngako nangabe bewungakase ukucabange. Phela lemikhuba yekufuna kulinga yonkhe intfo, yandzile kini nine labancane. Kube kuya ngami nje wena mntfwana-anti ngabe tindzaba lenicocelwa tona nguletikhuluma ngebuhle betimilo netento tebantfu, ningacocelwa ngebubi betento tebantfu nekutsi bayigila njani imikhuba**

Kungako-ke lamuhla ngisabuka letinkhomo leti temabheka, ngifikelwa ngulemicabango. Kungumthandazo wami lona lotsi bantfu bangatikhandzi sebasigalajela batsi sibotidla sitibeka ematsambo. Gijima-ke uyotijubela mzala, nato setiphikelele kwewelela emabeleni alapha kaMajuba. Phela kulomnyaka lophelile Maseko waboshwa nguye, aze ahlale esitokisini emalanga lamatsatfu, ngendzaba yato letinkhomo letingena emabeleni. Buka ngoba bekangekho asesemtsimbeni wakamalume wakhe eMkhondvo nakabuya wakhandza licala lembule ingubo langena. Wafela nje kuba yinhloko yelikhaya.

Utawuyiva kwesibili lenkhulumo.

*Repeat from *to**
Pause 00'30"*

R1 Uyaphela la umsebenti wesihlanu. Loku kusho kuphela kweluhlolo.

In a moment your invigilator will stop recording and collect your paper. Please check that you have written your name, centre name on the question paper. Remember, you must not talk until all papers have been collected.

Pause 00'10

Invigilator, please collect all the papers.

Thank you everyone!!!